

HEADLINES (EVENING)

Date – 25/12/2024

Time - 18:30 -18:40Hrs

- Kum engemaw zah hnu-ah Aizawl khawpui-ah halpuah leh halmawi tel lovin Krismas urlawk zan hman a ni.
- Odhisa larsap atana ruat thar Mizoram larsap Dr Hari Babu Kambhampati chuan a chawlh hun a pawt tawi.
- India rama a hmasa ber tur, Ken leh Betwa lui thlunzawm hna thawhna tur lung, vawiin khan Prime Minister Narendra Modi-a'n Madhya Pradesh-ah a phum
- Mi 67 phur Azerbaijan thlawhna chesualah mi 50 chuang an thi.

<><><>

CHRISTMAS-FIREWORKS

Kum engemaw zah hnu-ah Aizawl khawpui-ah halpuah leh halmawi tel lovin Krismas urlawk zan hman a ni.

Kumin Krismas urlawk zan, nizan kha Krismas hla lar tak ang mai-in 'Zan thiang reh' hun hman a ni a, buaina lian tham a awm hriat a ni lo. Sorkarin khauh taka halpuah, halmawi leh a behbawm a khap chuan rah tha chhuahin urlawk zan muanawm leh boruak thianghlim tak a ni a. Home minister Pu K. Sapdanga chuan mipui hnenah lawmthu a sawi tih Akashvani Aizawl a hriih. Pu K. Sapdanga chuan kum hlui thlah zan chu a huphurhawm zawk tih pawmin Kumhlui thlah zan atan hian Aizawl khawpui tuam turin Police team 13 an insiam thu a sawi a. Sr. SP/AIGP te'n he'ng Police team te hi an ho ang a, YMA/JAC/ VDP te an veng theuhah an duty bawk ang a, drone eng emaw zat chung lamah an duty bawk dawn niin a sawi.

Nizan khan Home Minister Pu K. Sapdanga hian Christmas boruak muanawm tak neih a nih theihna atana Aizawl khawpui chhunga Police duty-te bakah YMA leh VDP Duty post-te a tlawh kual.

Home Minister chuan Christmas urlawk zana boruak muan awm tak chu mipuite thuawih rah leh duty-te inpekna a nih thu sawiin, Mizoram sorkar thuchhuah halpuah leh puak thei thil dang khap chu December ni 31, kumhlui thlah zan thlenga khauh taka kenkawh a pawimawh thu a sawi a, Home Minister hi Mizoram Police hotute bakah Central YMA Kumpulan Committee hruaitute, Akashvani Correspondent leh chanchinbumi thenkkhat te'n an tawiawm a ni.

Hetih lai hian Reiek khua a Pu Ramchangliana te chungkuain kumtina an tih danin nizan khan an khaw naupang a duh duh tan Urlawk zan pualin thleng an dawh tir leh a. Nizan khan naupang 192-in thleng an dawh a ni.

Catholic kohhran chuan nizan khan 'mass thianghlim' Lalpa Zanriah Sakramen hun an hmang a, vawiin lamah an buatsaih bawk.

Vawiin Krismas Ni chu Aizawl khawpui leh a chheh velah chuan Pathianni angin biak-in tinah Krismas puala Pathian biak leh chawimawina inkhawmna hun atan hun hman a ni a. Krismas ni chawhma Pathian biak inkhawmah Presbyterian Kohhran chuan Synod atanga thupui thlan, "Lal thar a piang, mi f'ing ten Chibai an buk" tih an ngaithla a, thu chhiar inchhawn (Responsive Reading) an nei bawk. Nau piang chibai bukna thil pek lakkhawm niin, inkhawm banah thingpui ruai an theh a. Zana "Isua Chibai buku chuan kawng an thlak thin" tih ngaihthlak a ni leh ang. Kohhran

tam ber chuan naktuk lamah Krismas ruai an theh dawn a, vawiin lama theh tawh pawh an awm dawn ni a thudawn a ni.

Nizan December Urlawk Zan chu boruak muanawm tak hnuaiah Serchhip District chhung khaw hrang hrangah mipui ten hlim taka hmangin, boruak duhawm lo thleng a awm lo a. Khawpui chhûng branch YMA ten kumtina an tih thin angin duty post an siam a. Duty post hi Dist thuneitute, Sub Hqrs leh Excise enforcement ten a hran theuha tlawhin thingpui lumna atân pawisa leh hmanruate an pe a ni.

Champhai district ah pawh mipuite'n buaina leh harsatna lian tham awm lovin Krismas hun an hmuak thleng a, Champhai District a Police station leh Out Post hrang hrang, Champhai, Dungtlang, Farkawn leh Hnahlan ah te boruak a muanawmin Lock up te a ruak vek a ni. Kohhran tam zawkin vawiinah chhang ruai an theh a, naktukah naupiang lawmna ruai an kil hlawn ang.

Kolasib District chhunga khaw hrang hrangah nizan urlawk zan ah leh vawiina Krismas lawmna-ah boruak a ralmuang a, Kolasib District chhunga Police station leh Outpost hrang hrangah te pawh thil duhawm lo thleng hriat tur a awm lova man pawh an awm lo. Halpuah hal leh a kaihnawih thila inhnawnawih pawh man an nei lo. Vawiin tlai hian hriat theih chinah Catholic Kohhran, ICI leh Khuangpuilam UPC (NEI) te chuan Christmas ruai an theh a ni.

Khawzawl District-ah pawh boruak muanawm tak hnuaiah Krismas lawm a ni a. Buaina leh harsatna lian tham a awm lova, District Police Station-ah dan bawhchhiatna lam hawi thubuai a awm lo a, boruak a ralmuang hle. Chawngtlai khuaah chuan niman Urlawk ni khan Eco-Tourism Concert buatsaih a ni a, Khawzawl District chhung leh pawn atangin zaithiam tak takte an zai a ni.

Lawngtlai district-ah chuan nizan urlawk zanah khawi hmun atang mahin thil duhawm lo thleng hriattur a awm lova, boruak tha lo thleng thei vengin Police leh Young Lai Association te an duty a, zan rei tak thlengin veng hrang hrang ah Krismas zaikhawm thawm hriattur a awm. Vawiin Krismas chu chawhma lam ah Kohhran hrang hrang te Biak In ah inkhawmin, Isua Krista, mihringte tlan tura khawvela a pianna lam hawi thusawi tura ruatten an sawi a. Vawiin lamah Kohhran thenkhat ruai nena Krismas lawm an awm laiin, Kohhran tam zawk chuan Thingpui ruai buatsaihin, naktuk lamah ruapui thehin Krismas lawmna hi neih chhonzawm an tum.

Mamitah chuan Pathian ni anga hman a ni a, Mamit a Kohhran hrang hrang chuan inkhawmna hun hman a nih bakah nizan inkhawm ban atangin Kohhran mite an zaikhawm a ni. Kohhran hrang hrangte chuan chawhma inkhawm banah thingpui ruai buatsaihin Kohhran thenkhat chuan Zo chhangban an hmeh. Kohhran thenkhat te chuan vawiin hian Krismas ruai an theh nghal a, Kohhran thenkhat te erawh chuan naktuk khian krismas ruai an theh thung dawn a, vawiin lama ruaitheh tawh thenkhatte pawhin naktuk khian ruai an nawn ang. Nizan urlawk zan pawh kha Mamit khawpui chhungah boruak muanawm tak hnuaiah hman a ni a, thil duhawm lo thleng hriat tur a awm lo.

<><><>

CYMA

Central YMA Vice President leh Kumpulan Chairman ni bawh, Professor Lalnuntluanga chuan YMA chu ram thatna tura roreltute hmalakna tawiawm a, tanpui a an kaiha vengtu an nih thin thu a sawi.

Akashvani Aizawl correspondent nen an inkawmnaah Professor Lalnuntluanga chuan Mizoram sorkarin Christmas leh kumthar vuakvet a halpuah leh puak thei thil dang a khap chu a hlawnhtlin ngei theih na'n YMA chuan ke a pen mek thu a sawi a. Hemi chungchangah hian Central YMA chuan sub headquarters, group leh branch tinah te pawh mipuite hnena lehkha an tihchhuah thu a sawi. Kum dangah pawh YMA member-ten theihtawp chhuah a tan an thin avangin Zoram mipuiten Christmas leh kumthar hun hlim leh thlamuang taka an hman thin thu a sawi bawh a ni.



GOVERNOR

Odhisalarsap atana President Droupadi Murmu-i'n a ruat thar Mizoram larsap ni mek Dr Hari Babu Kambhampati chuan a chawlh hun pawt tawi-in naktip hian Aizawl a lo lut dawn.

Aizawl Raj Bhavan atanga Akashvani Aizawl-in thu a dawn danin larsap hi Inrinni-a Agartala a NEC Plenary session hmanga a kal chu lo let leh tawh lovin an khaw lamah Krismas leh kum thar chawlh hmang turin a tlang a. Kum thar zawha lo haw chauh tura a inruahman lai-in sawn a nih tak avangin a chawlh hun pawt tawi-in Zirtawpni hian a lo kir leh dawn a. A chhan engmah a sawi lo na-in a pawn thuah telin Odhisalarsap hna zawm turin a kal dawn niin an ngai. Odhisalarsap bang ta Raghubar Das thlaktu tur a nih avanga hmanhmawh taka insingsa tura lokir hma ni a rin a ni.

Hetih lai hian Mizoram larsap atana ruat thar General Vijay Kumar Singh-a'n a hna a rawn chelh tan hun tur chu official-a an la hriat rih loh thu Raj Bhavan atanga thudawn chuan a sawi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



KEN-BETWA LINKING PROJECT

Cheng vbch sing 4 sang 4600 senga Ken lui leh Betwa lui thlunzawm hna thawhna tur lung, wawiin khan Prime Minister Narendra Modi-a'n Madhya Pradesh-a Khajuraho-ah a phum a, Ken-Betwa River Linking Project hi India rama a hmasa ber tur niin Madhya Pradesh leh Uttar Pradesh-a Bundelkhand biala buh bal hmun chawmna tura ruahman a ni.

He hna hi Madhya Pradesh dist 10 huamchhunga ram hactare nuai 8 sing 1 sang 1 leh Uttar Pradesh-a ram hactare nuai 1 sing 9 sang 2 chawm thei tura ngaih a ni a, loneitu chungkaw nuai 44-in an hlawkpui thei dawn a ni. Hei bakah hian Madhya Pradesh-a mihring nuai 44 leh Uttar Pradesh-a mihring nuai 21-in hnianghnar takin tui thianghlim an dawn phah theih dawn bakah eizawmna thar tam tak a siam phah beisei a ni bawk.



AZERBAIJAN PLANE CRASH

Wawiin khan Kazakhstan-a Aktau tumhmun bulah khualzin phur Azerbaijan thlawhna a tla a, mi 50 chuang an thih bakah mi 6, na takin an hliam bawk. Khualzin 67 leh hnathawktu 5 phur thlawhna hi Azerbaijan-a Baku atanga Russia-a Grozny pan tur a ni a, chhum a chhah avanga a thlawh kawng sawn a ni.

Thlawhna hian sava thlawk lai a sut hnuah a khawl lamah buaina a awm thu, lei lam a hrilh a, hemi hnu hian a tla zui ta nia sawi a ni.

